



## KANTONALNO TUŽILAŠTVO U SARAJEVU NAREDILO ISTRAGU

# SIPA pretresala UKCS i izuzela dokumentaciju

**M. LINGO-DEMIROVIC**

**SARAJEVO** - Državna agencija za istrage i zaštitu (SIPA) proteklih dana, po nalogu Kantonalnog tužilaštva Sarajevo, pretresala je Univerzitetsko-klinički centar u Sarajevu (UKCS).

Proteklih dana je, kako saznajemo, izuzeta određena dokumentacija iz UKCS, te pretresene kancelarije Sebije Izetbegović, direktorice UKCS i supruge člana Predsjedništva BiH Bakira Izetbegovića.

Azra Bavčić, glasnogovornica Kantonalnog tužilaštva

Sarajevo, potvrdila je juče "Nezavisnim" da je ovo tužilaštvo zatražilo od SIPA da provjeri određena saznanja, ali da ništa više ne može reći za javnost.

### PRETRESENE I KANCELARIJE DIREKTORA UKCS SEBIJE IZETBEGOVIĆ

Iz Informativne službe UKCS su kazali da nemaju odobrenje da daju informacije medijima.

"Kada je u pitanju postupanje u predmetu Klinički centar, obavještavamo vas da se mjere i radnje preduzimaju po naredbama i zahtjevima Kantonalnog tužilaštva Kantona Sarajevo", saopštili su iz SIPA.

Prvi razlog zbog kojeg su istražitelji SIPA u UKCS, a po pisanju portala Faktor, je provjera navoda o zadržavanju novca ljekara, članova Ljekarske komore Kantona Sarajevo. Kao što je poznato, novac ovih ljekara nije uplaćivan na račun Komore, jer su delegati Skupštine Komore iz KCUS, kao i neki drugi delegati iz ostalih zdravstvenih ustanova u KS, tražili da im se prvo ispostave izvještaji o radu Komore i utrošku njihovog novca. Novac od članarina je zadržan na računu UKCS. U međuvremenu, voljom delegata Skupštine, je izabrano novo rukovodstvo Komore.

Prema nezvaničnim navodima, istražitelji SIPA su u UKCS i zbog lošeg poslovanja prethodnih menadžmenata i ogromnih gubitaka.

"Akumulirani gubitak iznosio je više od 37 miliona KM, a istovremeno je neracionalno te neosnovano trošen novac za regres, plaćena odustva, nagrade, komisije i mobilne telefone generalnog direktora", navodi se u revizorskom izvještaju o poslovanju UKCS u 2014. i 2015. godini, koji je objavljen krajem prošle godine.